

CARTA UU JEE NI TEE SAN PEDRO APOSTOL NUU ÑAYUU CACANDIJE

1 Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jíin rí jijnáhan ri ni canihīn rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ²Te ñūhun ni rí jeē na sáha ga yā jeē váha ndasí rōhó jíin jéē yóhyo coo ndeyí coo siī ni rō siquī jeē cájecūhun vāha ni rō ndese Yaā cúu Yaā Dios jíin Jítóho yō Jesús.

Siquī ndese cánuú coo ñayuu cácanđije

³Te Yaā Dios, jíin poder yā ni jēhe ya nuū yō tāca jéē sáha jeē cúu caca ndaā yō nuū yā jíin jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnū ya jíin táca jniñu jéhnū sáha ya. ⁴Jeē yúcuán ní jejnūhun ya tāca jéē yóhyo jéhnū yōhyo vāha sáha ya yohó, návāha jíin táca ún te nduu rō nájñūhun íyó máá yá, te cācu rō núu jniñu jeē cándiyo néé ni ñayuu casáha i ini ñayívi yáha. ⁵Núu súcuán te na ndúcú ndeyí rō

jíin jnūhun yáha. Te jeē cácanđije rō, te siquī ún na chísóo rō jeē caca ndaā rō. Te jeē cájica ndaā rō, te siquī ún chísóo rō jeē cóndihvī ni rō jecūhun vāha ni rō. ⁶Te siquī ún chísóo rō jeē casi rō modo jeē cuní maá rō. Te siquī ún chísóo rō jnūhun cuandeyí ni rō, te siquī ún chísóo rō jeē chiñúhún váha rō Yaā Dios. ⁷Te siquī ún chísóo rō jeē cóo manī rō jíin jnáhan rō, te siquī ún chísóo rō jeē cundáhú ni rō jnáhan rō.

⁸Chi núu cayā tācá jniñu yáha jíin rō, te suu sáha jeē ma cótecu saá-ni rō, chi sa quee vāha jniñu sáha rō, síquī jeē cájecūhun ni rō ndese Yaā cúu Jítóho yō Jesucristo. ⁹Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰Jeē yúcuán na ndúcú ndeyí rō hermano, návāha coo seguro jeē ní cana ya rohó jíin jéē ní nacāji ya rohó. Chi núu sáha rō táca jniñu yáha, te ma cáca yátá cuítí rō. ¹¹Yúcuán na te nune vāha ichi quívi rō ini ñuu maá Jítóho yō Jesucristo, Yaā jnáma yóhó, nuū ndácu ya jniñu níí cáni.

¹²Jeē yúcuán ma jécuiñī rī sáha ri jeē núcūhun ni rō tāca jnūhun yáha, vēsú je cájini rō te cáhiin nihin ró jíin jnūhun ndaā jeē cācandíje ró. ¹³Chi jéni ni rī jeē iyó váha stíhví ni rī rohó vijna tēcu gā rī, návāha nucūhun ni rō. ¹⁴Chi máá Jítóho yō Jesucristo ni castūhun yá nuū rī jeē tuá cotecu nahán rī ñayīvi yáha. ¹⁵Jeē yúcuán na ndúcú ndéyí gá rī stíhví ni rī rohó, návāha núu je ni jīhī rī, te níní nucūhun ni rō tāca jnūhun yáha.

Jeē ní cajito de jeē cujéhnu Cristo

¹⁶Ná ni castéén rī jnūhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī iin cuento-ni jeē ní catava ndichí ñáyuu. Chi ná ni cahīyo ri jíin yá xinī yúcu, te ni cajito jíin núu rī jeē tucu ni nduu ya jeē ní nduluu jéhnu ya. ¹⁷Chi ni cajini rī jeē Tatá yō Yaā Dios ni cahān yiñúhún yá jíin Jesús, te ni sajeéhnu ya Jesús. Chi ichi ándiví ní quiji jnūhun luu, ni cahān Yaā Dios: Yāha cúu Sēhe ri jeē maní ndasí rī jíin, te cúsiī ni rī jíin, áchí yá. ¹⁸Te ni cajini sōho ri jnūhun un jéē ni cáhān ichi ándiví, chi ni cahīin ri jíin máá Jítóho yō xinī yúcu iī ún. ¹⁹Te súcuán cájini yō jeē iyó ndáā ndije tāca jnūhun ni catee tēe ni canacani jnūhun ya nde jenahán. Te vāha jeē na chúhun ni rō jnūhun un jíjnāhan ró, chi suu cúu nájnūhun iin luz jeē cayú nuū néē, nde na cúndijin quivī ndíji ya, te stéén yā ini anuá rō nájnūhun jeē ndíndéé lucero. ²⁰Te xihna gā na jécūhun ni rō jeē ni iin jnūhun cáhān tutu iī, nasūu jéē súcuán-ni ni cajeñi ni

tēe cúu. ²¹Chi tāca tēe ndoo jeē ní canacani jnūhun ya nde jenahán, tu ní cácahān cuíti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni stéén Espíritu Santo nuū de.

Siquī tēe cástéén jnūhun stáhú

(Judas 4-13)

2 Te mēhñu ñáyuu Israel ún suni ni cahīyo tēe ni canacani jnūhun stáhú. Te suni súcuán coo tēe stéén jnūhun stáhú méhñu ró. Te squívī de jnūhun stáhú jéē tívi ñáyuu sáha. Te ni ma cuajnúhún de Jítóho yō jeē jnáma ya de, te súcuán sáha de jeē jnahnú ndetū yachī de. ²Te cuehē ñáyuu condiquin i modo neé jéē castéén de. Te sáha de jeē cahán neé ñáyuu siquī jnūhun vāha ya jeē cúu ichi ndaā. ³Te siquī jeē cándiyo ni de xūhún, te quende de xūhun ró siquī jnūhun stáhú stéén de nuū rō. Te tu quíxín jnūndóho jnahnū ndetū de, chi nde jenahán je ndétu jnūhun ndonda ya siquī cuéchi de.

⁴Chi tu ní íne cáhnu ni Yaā Dios nuū tēcá ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhnī jíin cadena. Te ni chindihyū yā nde quivī sándaā yā siquī. ⁵Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néé un. Te máá-ni Noé, tēe ni nacani jnūhun ndaā, ni scácu ya de jíin úxā gā ñáyuu. ⁶Te suni ni ndonda ya siquī cuéchi ñáyuu ñuu Sodoma jíin ñuu Gomorra, te ni cayū ñuu i ni nduu máá yáa na. Te súcuán cúu i iin ejemplo nuū tāca gá ñáyuu

sáha néé jéé quíji ga. ⁷Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu néé ní casáha ñayuu neé un. ⁸Chi tēe váha un ní condee de mēhñu ñáyuu ún, te ndíquívī ni nacani cuíhyá ni de jeē ní jini sōho de ni jito de tācá jniñu néé ní casáha i. ⁹Núu súcuan te máá Jítóho yō chi jnáma ya ñayuu cáchiñúhún núu yā, te núu vēji jnūndóho siquī i. Te chíndihyū yā ñayuu casáha néé, návāha ndoho i castigo quívī sándaā yā cuēchi i.

¹⁰Te víhyá gā stóho ya tēe cásáha jniñu jnéhén jéé ndíyo néé ni de, te cácuu jéé ni de siquī jniñu ndácu máá Jítóho yō. Nihni ndasí ni de, te cáhundeyí ni de sáha de jeē cácuu maá de, te tu cáyūhú de cahān ndevāha de siquī tāca jéé cácujuhnu nuū sucún. ¹¹Te ni máá ndajéhé jeē cáhiin nuū Jítóho yō, vēsú cácujuhnu ga yā jíin fuerza jíin jniñu ndíso ya, te tu cácahān ndevāha ya siquī tāca jéé cácujuhnu ún.

¹²Te tēe ún chi cácuu de nájñuhun quítī yúcu jéé ni jéconaa tī jíin modo sáha tī, te cátahū tī návāha nihīn ñayuu tī cahni i tī. Chi cácahān neé de siquī tāca jéé tu cájecūhun ni de. Te cuu de nájñuhun jíhí tācá quítī ún. ¹³Te jeē ní castóho de ñayuu, suni súcuan nanihīn de ndoho de. Te cácusī ni de jíin tāca jéé cácajni ni de, te cásáha de tācá jniñu jeē cándiyo néé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níní cácusī ni de jíin jniñu néé jniñu stáhú.

¹⁴Te cándiyo ni de cájito de ñahan, te tu cájecuñī de sáha de cuēchi. Te cástáhú de ñayuu tahya ni. Chi ni cacāan de jíin jnúhun ndíyo ni de tācá ndajñū. Te tēe jnahnū ndetū cácuu de. ¹⁵Te ni casana de, chi ni castóo de jnúhun jeē cúu ichi ndaā. Te ni candiquīn de modo Balaam, tēe ni nacani jnúhun nde jenahán, séhe Beor. Chi tēe un ní cusī ni de nihīn de xūhun síquī jnúhun néé jéé cahán de. ¹⁶Te iin burro ni cahān tī nájñuhun iin ñayuu, vēsú quítī ñihīn cúu tī. Te ni cahān tī nuū tēe ún, te súcuan ni jesi tī jeē ma quihín de cahān de tāca jnúhun néé stívi.

¹⁷Te tāca tēe súcuan chi cácuu de nájñuhun tesoco íchi, nájñuhun vicō jeē stehí táchi. Te jnahnū ndetū de quívicoo de nuū néé nuū lúchi jnúu coyūcú de níí cáni. ¹⁸Chi yōhyo cásándúxí de máá de jíin jnúhun cácahān saá-ni de. Te cánducú de squívī tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeē sa ní quenda i ni cācu i nuū ñáyuu casáha jniñu néé. ¹⁹Te cácahān de jeē cáhiyo libre i sáha i ndese-ni cúní maá i, te ni máá de tu cáhiyo libre de, chi cácuu de mozo nuū cuēchi, chi máni jniñu jnéhén cásáha de. Chi tācá jniñu jeē cúndeyí jíin iin tēe jeē sáha de, suu yūcuan ndúu de mozo nuū. ²⁰Chi núu je ni cajini de ndese Yaā cúu máá Jítóho yō Jesucristo, Yaā jnáma yóhó, te núu súcuan ni quenda de ni cācu de nuū jniñu jnéhén íyó ini ñayīví, te yūcuán na te núu ndívicoo tucu de nuū jniñu un jéé cúndeyí tucu jíin de, núu súcuan te néé gá quendōo

de jeē sándihí vēsú jeē xíhna ñúhún. ²¹Chi vāha ga núu jeē tu ní cájini de jñūhun ichi ndaā nuú, vēsú jeē ní cajini de, te stóo tucu de jniñu ndoo jeē ní ndacu ya nuú de. ²²Chi cúndaā jíin de nájñūhun cáhán iin jñūhun jenahán: Ina ni nacaji tī jeē ní ndujen tī. Te quivī ní ndundo, ni nacuchi tucu tī ndehyū, achí.

Siquī jeē ndíji Jítoho yō

3 Ñánī mánī, yāha cúu carta uū jeē tée ri nuú rō. Te jíin ndindúú carta yāha cúní rī jeē nacani ni rō siquī ndíhi jeē vāha ndaā jeē jéni ichí rí rohó. ²Te na núcūhun ni rō tāca jnúhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuú rō.

³Te xíhna gā jñūhun yāha na jécūhun ni rō: Jeē nuú cuándihí quivī te quijicoo tēe sácatā siquī jnúhun ndaā yā, chi sáha de tācá jniñu néé jéé ndíyo ni maá de. ⁴Te cahān de jíjnáhan de: ¿Najehē cúu jeē tu ndíji Cristo nájñūhun ni jejnūhun ya? Chi nde quivī ní cajihí jí yō te nde vijna, tu ndé sáma cuití ndíhi jeē iyó ndé ná ni jecōo ñayīví, achi de. ⁵Chi tu cácuu de jecūhun ni de jeē ndé jenahán ní cuvāha andíví jíin jnúhun ni cahān Yaā Dios. Te ni ndacu ya jniñu jeē na cuvāha ñayīvi jíin ndute, te mēhñú ndute ni nane ñūhun íchi. ⁶Te suni jíin ndute ni naa ñayīví jenahán, chi ni ndaa ndute jeē ní cuun saū xeén. ⁷Te suni súcuu jíin jnúhun ni cahān Yaā Dios ni sátūhva ya jeē cayú andíví jíin ñayīvi iyó vijna.

Chi máá quivī juicio te cayū ndíhi, te jñahnū ndetū ñayuu ni casáha néé.

⁸Te suni ma náā ni rō jñūhun yāha, ñánī mánī: Jeē nuú maá Jítoho yō chi iin quivī cúu nájñūhun mil cuiyā, te mil cuiyā cúu nájñūhun iin quivī-ni. ⁹Chi nasūu jéé cucuée máá Jítoho yō siquī jnúhun ni jejnūhun ya, nájñūhun cájeni ni sava ñayuu. Chi sa suhva iyó paciencia ni yā nuú yō, chi tu cúní yā jeē jñahnú ndetū ni iin yó, chi sa cúní yā jeē ndíhi yó nacani ni yō stóo yó cuéchi yó.

¹⁰Te quivī ndíji máá Jítoho yō, iin sanaa-ni te quee, nájñūhun iin sanaa-ni te quee ñacuñhá jecuáá. Te quivī ún chi ñihñi ndasí andíví, te naa-ni. Te ndíhi jeē iyó andíví chi naa sáha ñūhūn. Te ñayīvi jíin táca jéé iyó ini, ndíhi cayū.

¹¹Te núu súcuu naa tācá un, te cánuú ndasí jéé coo ndoo ánuá rō te chiñúhún vāha ro yá jíjnáhan rō. ¹²Te condetu rō te condíhvī ni rō jeē na quee yachí quivī ndíji Yaā Dios. Te quivī ún cayū andíví te naa-ni, te tāca jéé iyó chi ndute sáha yáñūhūn. ¹³Te máá yó chi cándetu yó andíví jéé jíin ñayīvi jéé, chi súcuu ni jejnūhun Yaā Dios. Te yūcuán chi mánī jniñu ndaā jíin jniñu vāha coo.

¹⁴Núu súcuu, ñánī mánī, níní jéé cándetu rō jéé squícu tācá jniñu yāha, te na ndúcú ndéyí rō návāha quivī ndíji ya te nihñi yā rohó jéé cáyūcu mánī rō, te coo ndoo rō jéé tú na cuéchi rō. ¹⁵Te na jécūhun ni rō jeē siquī jeē iyó paciencia ni maá Jítoho yō, jeē yúcuu cácu yó. Chi hermano yō

Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. ¹⁶Te cáhán de siquī jnúhun yáha núū tāca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ni jíin ñáyuu tu íje jíin jnúhun cándíje, cánasama i modo steén jnūhun yí un, nájnuhun násama i jeē cahán sava ga tutu ií. Te súcuan sáha i jeē jnahnú ndetū maá i.

¹⁷Te rōhó ñání maní, vijna te je ni cajini rō ndese coo tācá jniñu yáha. Núu súcuan te coto má condiquin rō jnūhun stáhú cástéén ñayuu casáha néé. Chi núu tuú te snáa rō jnūhun cáhiin nihin ró jíin. ¹⁸Chi sa na cóndihvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē yóhyo luu cújéhnú ya nde vijna jíin nń cáni. Súcuan na cóo. Amén.